

四庫全書

史部

欽定四庫全書

史部

欽定續文獻通考卷一百二十一

給事中^臣陳化龍覆勘

總校官內閣中書^臣孫溶

欽定四庫全書

欽定續文獻通考卷一百二十一

兵考

臣等謹按馬端臨作兵考始自周官迄南宋嘉定
之世門分類別皆縷悉言之可稱賅備顧嘗合考
有宋南北兵制自太祖建隆時定制至神宗熙寧
時中多更變故史志以建隆以來之制與熙寧以
後之制分為二大目自建炎下則以熙寧以後統

之今纂續考而僅斷自寧宗則史志既無可詳徵而紀傳又多偏舉何足規一代之全哉故於兵制門內凡寧宗前制度宜載者皆因事追叙之禁衛郡國二門凡史志熙寧以後禁廂軍之制皆節其大畧登之各卷之前而以寧宗後紀傳之文遞列於後其中有已見馬考者亦藉以互相訂正焉遼金元以兵興國遼有鄂爾多巴納部族等名金有貝勒明安穆昆等號元制宿衛諸軍在內鎮戍諸

軍在外內外相維以制輕重之勢其見於志傳者亦各依次編輯明代京營之制則仍仿馬考叙唐府兵之例載之兵制而不入禁衛其侍衛上直軍四衛營專主護駕巡緝之事此古羽林之類故入禁衛至衛所在京在外俱有分之未免割裂而不完故總其大綱入兵制而在外者亦互見郡國若班軍即衛卒之番上於京營者故與清理軍伍及賞功之制皆入兵制邊防民壯土兵則入之郡國海防

江防則分入之郡國舟師餘俱以類分入各門俾
彼此不致歧出庶可展卷而得其條理云

兵制

宋寧宗嘉泰四年六月置諸軍帳前雄校以軍官子孫
補之

嘉定十年四月詔出戍官兵全給其家

臣等謹案志載光宗紹熙元年知常德府王銖言
沿邊城砦之官以備疆場不虞廩祿既薄給不以

時孤寒小吏何以養廉致使熟視姦猾泄漏禁物
公私庇蓋恬不加問從而徇私受賕者有矣弓手
士軍戍卒傭直糧食累月不支迫於飢寒侵漁蠻
獠小則致訟爭大則啓邊釁乞嚴飭州軍按月廩
給如其未支守倅即不得先請已俸庶俾城砦官
兵有以存濟緩急之際得其宣力安邊弭盜莫此
為急此寧宗時出戍全給之制蓋亦所以厚待士
卒也無如奸弊日增厥後遂多冒濫以糜廩粟此

宋人所以深歎夫養兵以自困也歟

十一年臣僚請汰中外諸軍老弱卒

先是中書舍人莊夏言今日之患莫大於兵冗乞行
下將帥令老弱自陳得以子若弟姪若婿強壯及等
者收刺之代其名糧帝曰兵卒子弟與召募百姓不
同卿言是也至是臣僚言軍政所先莫如汰卒若干
兵中有百人老弱遇敵先奔即千人皆廢矣乞嚴飭
中外將帥務覈其實

理宗淳祐十一年御史臺奏軍功賞格違法之弊

御史臺條奏言在法邊戍獲捷奇功制閫軍帥舉奏

授官必其人身親行陣有戰禦功今日守闕進勇副

尉

此即効用軍內之舊名公據者也紹興五年以公據甲頭名稱未正改公據為守闕進勇副尉甲頭

為進勇副尉

至承信郎承節郎者乃以奉權要酬私恩或

轉售於人方等第賞功之初即竄名其中甚至承受

廳吏廝卒之流足跡未出都門而沾親冒矢石徃來

軍旅之恩授以名器請申嚴閫帥令立功人親授告

身庶草冒濫寶祐五年樞密院言應從軍職事必立
戰功并隊伍中人曾經拍試武藝若訓練官以遞而
升者或年限未及仍帶權字俟年及方升正統制此
定法也近年任子雜流冒授者繇統領至總管曾幾
何時超躡而進甫得總管却恥軍職輒稱私計不便
或託父母老疾巧計離軍又以筋力未衰求差正任
甚非法意至咸淳中大將若呂文德夏貴孫虎臣范
文虎輩矜功怙寵慢上殘下行伍功賞視為已物私

其族姻故將裨將士身膏草莽而奸人坐竊其勲爵
矣

寶祐五年七月詔諸路閫帥司招填軍額申嚴占借之
禁

初寶慶間給事中莫澤奏曰州郡禁軍平時則以防
寇盜有事則以脩戎行實錄於朝廷非州郡可得私
役比年州郡軍政隳廢各於廩給闕額恒多郡官主
兵官有窠占寓公有借事存留者不什一雖號主兵

僅守虛籍莫敢號召且一兵請給歲不下百緡以小計之一郡占三百人是虛廢三萬緡也私役禁軍素有常憲守帥闢園池建第宅不給餐錢寓公去城遼絕類得借兵擾害鄉閭近而輔郡至有寓公占四五百兵者良由兵官之權輕而私占之禁弛也乞嚴戒監司卒倖等止許借廂軍仍不得妨教閱餘官雖廂軍亦勿借至是復申其禁

度宗咸淳二年五月詔諸節制將帥討軍實節浮費毋

占役兵士致妨訓練

臣等謹按占役日多則軍額日闕軍額日闕而廩給反日增此宋軍制之所以壞也志中言咸淳時軍將徃徃虛立員以冒稍食以建康言之有神策二軍有游擊五軍有親兵二軍有制効二軍有靖安唐灣水軍有游擊采石水軍有精銳破敵軍有効用防江軍原其初起惟騎戎兩司額耳後乃各創軍分額多而員少一統制月請以會子計之成

一萬五百千九年四川制司有言戍兵生券人月
給會子六千蜀郡物價翔貴請增人月給九千當
是時財賦之出有限廩稍之給無涯腴民膏血盡
充邊費金帛悉歸於二三大將之私帑國用益竭
而宋亡矣

十年十二月

時恭帝
已即位

提舉興國宮呂師夔請募兵江州

詔知州錢真孫同募尚書省以錢米給之

時邊報日聞召募尤急官降錢甚優厚所司莫能體

上意執民為兵或甘言誑誘或詐言賈舟候負販者
羣至輒載之去或購航船人全船疾趨所隸或令軍
婦冶容誘於路盡淫刺之由是野無耕人途無商旅
往往聚丁壯數十而後敢入市民有被執而赴水火
者有自斷指臂以求免者有與軍人抗而殺傷者無
賴乘機假名為擾自景定元年至咸淳九年凡招軍
二十三萬三千有奇

恭帝德祐元年二月詔募兵

三月以公田給佃主令率其租戶為兵

十一月詔被俘將士能率衆來歸者以人數補官能立功者予節鉞諸閫以下官以所招人多寡行賞

十二月給封樁庫錢為兵備又出安邊封樁庫金付浙東諸郡為兵備

遼制凡民年十五以上五十以下隸兵籍

人鐵甲九事馬韉轡馬甲皮鐵視其力弓四箭四百長短鎗鎗錄斧鉞小旗鎚錐火刀石馬盂糲一斗糲

袋搭氈傘各一縻馬繩二百尺皆自備每正軍一名
馬三匹打草穀守營鋪家丁各一人人馬不給糧草
日遣打草穀騎四出抄掠以供之鑄金魚符調發軍
馬其捉馬國語解曰捉馬勾刷馬也及傳命有銀牌二百凡舉兵

帝率番漢文武臣僚祭神告陵畢乃詔諸道徵兵惟
南北奚王東京渤海兵馬燕京統軍兵馬雖奉詔未
敢發兵必以聞上遣大軍持金魚符合然後行始聞
詔攢戶丁推戶力覈籍齊衆以待自十將以上次第

點集軍馬器仗符至兵馬本司自領使者不得與惟再共點軍馬訖又以上聞量兵馬多少再命使充軍主與本司互相監督又請引五方旗鼓然後皇帝親點將校又選勲戚大臣充行營軍馬都統副都統都監各一人又選諸軍兵馬尤精銳者三萬人為護駕軍又選驍勇三千人為先鋒軍又選剽悍百人以上為遠探攔子軍以上各有將領又於諸軍每部量衆寡抽十人或五人合為一隊別立將領以備勾取兵

馬騰通公事其南伐點兵多在幽州北千里駕鵞泊
及行並取居庸關曹王峪白馬口古北口安達馬口
松亭關榆關等路出兵不過九月還師不過十二月
皇帝親征留親王一人在幽州權知軍國大事既入
南界分為三路廣信軍雄州霸州各一駕必由中道
兵馬都統護駕等軍皆從至宋北京三路兵皆會以
議攻取及退亦然三路軍馬前後左右有先鋒遠探
攔子馬各十數人在先鋒前後二十餘里夜行十里

或五里少駐下馬側聽有無人馬之聲其打草穀家
丁各衣甲持兵旋團為隊又於本國州縣起漢人鄉
兵萬人隨軍專伐林木填道路敵軍既陣量其陣勢
小大山川形勢往回道路救援捷徑漕運所出各有
以制之然後於陣四面列騎為隊每隊五七百人十
隊為一道十道當一面各有主帥最先一隊走馬大
譟衝突敵陣得利則諸隊齊進若未利引退第二隊
繼之退者息馬飲水抄諸道皆然更退迭進又令打

草穀家丁馬施雙帶因風疾馳揚塵敵陣更互往來
敵既飢疲目不能視可以取勝若陣南獲勝陣北失
利主將在中無以知之則以本國四方山川為號聲
以相聞得相揀應若帝不親征重臣統兵不下十五
萬衆三路往還北京會兵進以九月退以十二月行
事次第皆如之若春以正月秋以九月不命都統止
遣騎兵六萬不許深入但於界外三百里內耗蕩生
聚不令種養而已軍入南界步騎車帳不循阡陌三

道將領各一人率攔子馬各萬騎支散遊奕百十里
外更迭覘邏及暮以吹角為號衆即頓舍環繞御帳
自近及遠折木梢屈為弓子鋪不設鎗營塹柵之備
每軍行鼓三伐不問晝夜大衆齊發未遇大敵不乘
戰馬俟近敵師乘新羈馬蹄有餘力成列不戰退則
乘之多伏兵斷糧道冒夜舉火上風曳柴饋餉自膏
散而復聚善戰能寒此兵之所以強也

太宗天顯九年十一月括陽城及洼只城所俘丁壯籍

於軍

聖宗統和八年五月以宋降卒分隸諸軍

興宗重熙中彰愍宮使蕭罕嘉努陳西戍及補役之弊
時帝詔天下言治道之要罕嘉努言臣伏見比年以
來高麗未賓準布猶強戰守之備誠不容已乃者選
富民防邊自備糧糗道路修阻動淹歲月比至屯所
費已過半隻牛單轂鮮有還者其無丁之家倍直傭
僦人憚其勞半途亡竄故戍卒之食多不能給求假

於人則十倍其息至有鬻子割田不能償者或逋役
不歸在軍物故則復補以少壯其鴨綠江之東大率
如此況渤海女直高麗合從連衡不時征討富者從
軍貧者偵候加之水旱菽粟不登民以日困蓋勢使
之然也方今最重之役無過西戍如無西戍雖遇凶
年困弊不至於此若能徙西戍稍近則往來不勞民
無深患且諸部俱有補役之法昔補役始行居者行
者類皆富貴故累世從戍易為更代近歲邊虞數起

民多困乏既不任役事隨補隨缺苟無上戶則中戶當之曠日彌年其窮益甚所以取代為艱也非惟補役如此在邊戍兵亦然欲為長久之便莫若使遠戍疲兵還於故土薄其徭役使人人給足則補役之道可以復故也

道宗咸雍四年二月詔元帥府募軍

臣等謹按遼兵制之大目有四其宮帳軍則帝與后所置生則扈從死則守陵者也其部族軍則出

自各部族分隸南北府而守衛四邊者也其京州
軍則出自民間之丁籍者也其屬國軍則凡臣服
於遼者各出其軍以供驅使者也百官志曰四者
各自為軍體統相承分數秩然雄長二百餘年凡
以此也又按遼時兵機武銓羣牧之事皆屬北樞
密院謂之北院軍國大政則北南宰相皆佐理之北南
大王亦掌部族軍民之政北南院都統軍司掌北
南院從軍之政令北南詳察司掌北南院部族軍

馬之政令北南院都部署司掌北南院部族軍民之事北樞密院專主兵所謂北衙不治民也南樞密院專主民所謂南衙不主兵也以上所列有兵民兼治者有專治兵者遼初氈車為營硬寨為宮御帳之官不得不謹故有侍衛司北南護衛府宿衛司禁衛局宿直司硬寨司諸官又有四帳都詳袞司掌四帳軍馬之事錫里司掌皇族之軍政其北南面各官之掌兵事者北面部族官而下則北

而軍官自天下兵馬大元帥

皇子親王為之

至各詳衮司

為目盈百北面邊防官中上京路諸司以之控制

諸奚遼陽路諸司以之控扼高麗長春路諸司以

之控制東北諸國南京諸司以備禦守國西京諸

司以之控制西夏此外尚有諸路各司皆以助軍

政北面行軍官中得行樞密院至行軍都統所其

目幾三十北面屬國官因各屬國之首長與契丹

人區別而用其目更夥

以上南北官所治皆北面之事

南面朝官

中得燕代十六州後始置南面官以下專治漢人軍馬之事漢人樞密院掌漢

人兵馬之政又有諸衛武官自大將軍至左右神威軍為目二十一南面京官中有南京侍衛親軍馬步軍各官黃龍府侍衛親軍馬步軍各官南面方州官中則有各州某軍節度使至指揮使各官又有觀察至團練等官南面軍官中有都檢點都團練以下等官南面邊防官則自招安使以下至處置使司各官凡此皆載在百官志者夫遼之為

國隣於梁唐晉漢周宋自未與宋結盟以前疆場之事幾於無歲無之而且高麗西夏鋒鏑屢交戎政不修其何以國故一朝官制於治軍之職特詳可因以見紀律嚴明克敵致果之雄畧故雖已詳見職官考而特撮其要於此俾講求兵制者得考焉

金穆宗九年募軍得甲千餘

臣等謹按金甲兵之數始見於此蓋未嘗滿千也

遼人嘗言女直兵若滿萬則不可敵至太祖二年十一月出河店之戰兵始滿萬云

太祖即位之二年始命以三百戶為穆昆穆昆十為明安

繼而諸部來降率用明安穆昆之名以授其首領而部伍其人及拉林鴨水鐵驪拜格之民皆附東京既平山西繼定內收遼漢之降卒外籍部族之健士嘗用遼人額哩頁以北部百三十戶為一穆昆漢人王

六兒以諸州漢人六十五戶為一穆昆王伯龍高從祐等並領所部為一明安至太宗天會二年平州既平宗望恐風俗揉雜民情弗便乃罷是制諸部降人但置長吏以下從漢官之號至五年代宋調燕山雲中中京上京東京遼東平州遼西長春八路民兵隸諸萬戶其間萬戶亦有專統漢軍者

天輔七年四月詔自今軍事若皆中覆不無留滯應此路事務申都統司餘皆取決樞密院

臣等謹按應北路三字未甚明晰恐有脫誤王圻續通考直改作應州路未知何據今依史文書之

熙宗皇統三年六月初置驍毅軍

五年分明安穆昆為上中下三等宗室為上餘次之

時罷遼東漢人渤海明安穆昆承襲之制浸移其權於本國人故有此制至海陵天德二年省併中京東京臨潢咸平泰州等路節鎮及明安穆昆削上中下之名但稱為諸明安穆昆循舊制間年一徵發以補

老疾死亡之數

世宗大定三年八月詔罷契丹明安穆昆以其戶分隸女直明安穆昆

海陵南伐籍契丹丁壯為兵部人不願行遂反大定二年九月獲契丹斡罕餘衆悉平故有此詔

十五年十月遣吏部郎中富察烏琿等十人分行天下再定明安穆昆戶每穆昆戶不過三百七穆昆至十穆昆置一明安

至二十年又以祖宗所立明安穆昆戶口繁簡地理遠近不同正隆之後所授無度及大定間亦有功多未酬者遂更定以詔天下復命新授者並令就封其穆昆人內有六品以下職及諸局承應人皆為遷之三從以上族人願從行者明安不得過十戶穆昆不得過六戶

章宗明昌六年十一月初定明安穆昆鎮邊後放免者授官格

承安元年二月初造虎符發兵

至四年五月更定給發虎符制著於令宣宗貞祐三年七月更定所造諸符樞密院鹿宣撫司魚統軍司虎

五年正月定明安穆昆軍前怠慢罷世襲制

十二月定管軍官受所部財物輒放離役及令人代役法

泰和元年三月更定鎮防千戶穆昆放老入除格

四月詔諭契丹人戶累經僉軍立功者官賞悉例與女直人同

五年六月制鎮防軍逃亡致邊事失錯陷敗戶口者罪八年閏四月詔更定明安穆昆承襲程試格又定保甲軍殺獲南軍官賞

宣宗貞祐二年九月禁軍官圍獵

以秋稼未獲故也三年九月亦如之

三年正月尚書省言內外軍人入粟補官者多行伍浸

虛請俟平定應監差者與三酬門戶有職事者升一等其子弟應蔭者罷之詔可

是月勅尚書省入粟補官者毋括其戶為軍有司議賞軍功毋有所阻格

四月籍赴選監當官為軍既而免之

時下令僉軍會任子為監當者春赴吏部選宰執命取為監軍官皆憤愠哀號交愬臺省已而帝知其不可用免之至元光末備潼關黃河又僉軍諸使者歷

縣邑自見居官外無文武大小職事官皆充軍物議
紛然後亦罷之

八月詔武舉官非見任及已從軍者隨處調赴京師別
為一軍備用

興定元年二月命樞密院汰罷軟軍士

臣等謹按宣宗之時疆場多事兵力不支而養兵
之費亦絀志稱駿民膏血而不足乃行括糧之法
一人從征舉家待哺又謂無以堅戰士之心乃令

其家盡入京師不數年至無以為食考忠義傳中
納哈塔富拉塔於貞祐四年上言古者一人從軍
七家奉之興十萬之師不得操事者七十萬家今
籍諸道民為兵者十之七八奉之者纔二三民安
得不困夫兵貴精不在衆寡擇勇敢謀畧者為兵
脆懦之徒使歸農畝是亦紓民之一端也不報此
命樞密院之舉即脆懦歸農之意但其時奉行亦
多不力矣

六月詔樞密院遣經歷官分諭行院嚴兵利器以守衝要仍禁飲宴違以軍律論

八月增定擒捕逃軍賞格及居停人罪

臣等謹按金自承安用兵軍中設監戰官興定二年十一月宣宗召致仕官問時政得失轉運使伊喇福僧言曰軍中設監戰官論議之間動相矛盾不懲其失反以為法若輩平居皆選才勇自衛一旦有急驅疲懦出戰寧不敗事罷之為便書奏朝

廷畧施用焉傳文所載如此紀中無罷監戰官明文而此事實有關於行軍之制故附志於興定元年之後

三年正月定鎮戍征行軍官減資歷日月格

二月定軍中四品以下將校有罪主將便宜決罰

時胥鼎言軍中誅賞近制須聞朝廷賞由中出示有所歸可部分失律主將不得即治其罪不可詔尚書樞密雜議宰臣請城守野戰將校有罪從七品以下

許便宜決罰餘悉奏裁帝曰七品以下才令治之將權太輕或至誤事自今四品以下聽決

四年九月更定安泊逃亡出征軍人罪及捕獲賞格五年八月詔南征潰軍復歸而能力戰者依出界立功格賞之

十二月詔罷新僉民軍減樞密院掌兵官及京城戍兵仍諭行院帥府毋擅增設補僉又定詐誘征防軍人逃亡罪法

元光元年八月定西征將士官賞有差

二年二月詔軍官犯罪除大罪外有武藝善掌兵者量才復用

四月籍間官豪右親丁及遼東河北客戶為軍又募西山獵戶為軍五月僉河南路寄居官民充軍七月詔籍陝西僑居官民為軍

八月詔賞京兆路官軍保全南山諸谷之官以所全人數多寡為等第

千人以上官一階三千人以上兩階五千人以上三階仍升職一等能力戰護之者又增一階戰歿者就以贈之

哀宗正大二年議選諸路精兵直隸樞密院

時先設總領六員分路揀閱因相合併每總領司率數萬人軍勢既張乃易總領之名為都尉班在隨朝四品之列曰建威虎威破虜振威鷹揚虎賁振武折衝盪寇殄寇必以先嘗秉帥權者居是職雖帥府行

院亦不敢以貴重臨之

持嘉喀齊喀傳曰哀宗在東宮日立十三都尉每尉不下萬人強壯矯捷極為精練步卒負擔器甲糧糗重至六七斗一日夜行二百里忠孝軍萬八千人皆回紇河西及中州人被掠而逃歸者人有從馬以騎射選之乃得補親衛騎兵武衛護衛選外諸軍又二十餘萬故自即位以後屢有大昌原倒回谷之捷

陳規傳曰正大二年正月補闕陳規及臺諫同奏
一請簡留親衛軍一請沙汰冗軍減行樞密院帥
府一請選大臣為宣撫使招集流亡以實邊防畧
施行之

四年七月僉民軍

時元兵入京兆關中大震故僉民軍

天興二年九月詔汰冗軍及定官吏軍兵月俸自宰執
以下至於皂隸人月支六斗

初有司定減糧人頗怨望帝聞之欲分軍為三上軍有司給八斗中七斗下六斗人復怨不均乃立射格而上中軍輒多受賞連中者或面賜酒人益為勸

實嘉紐勒歡傳曰天興二年正月實嘉紐勒歡知歸德府以軍衆食寡懼不能給請令河北潰軍至者就糧於徐宿陳三州親衛軍亦遣出城就食帝不得已從之

兵志曰養兵之法熙宗天眷三年正月詔歲給遼

東戍卒紬絹有差海陵正隆四年命河南陝西統
軍司并虞侯司順德軍官兵並增廩給六年將南
征以絹萬疋於京城易衣襖穿膝一萬以給軍世
宗大定三年南征軍士每歲可支一千萬貫官府
止有二百萬貫外可取於官民戶此軍需錢所由
起也時言事者以山東河南陝西等路循宋齊舊
例州縣司吏弓手於民間驗物力均敷僱錢名曰
免役請以是錢贍軍命省具數以聞詔罷弓手錢

其司吏錢仍舊四年六月元帥府乞降軍需錢帝
曰帥府支費無度例皆科取於民其別具以聞十
年四月命德順州建營屋以處屯軍十七年七月
歲以羊皮三萬賜西北路戍兵章宗承安三年以
軍需所費甚大依黃河夫錢例驗各路新籍物力
每貫徵錢四貫西京北京遼東路每貫徵錢二貫
臨潢全州則免徵又以周年三限期遠定制作半
年三限輸納凡賞給之例自萬戶以下以遷官及

銀絹馬粟為差各有不同貞祐三年軍前委差及掌軍官規圖糧料冒占職役皆無實員又見職及遙授者已有俸給仍與無職事者同支券糧時議省減所給俟征行則全給之及興定二年彰化軍節度使張行信言一軍充役舉家廩給益欲感悅士心使為國盡力耳至於無軍之家復無丁男而其妻女猶受給何耶五年京南行三司官舒穆魯幹魯言京南東西三路見屯軍戶老幼四十萬口歲

費糧百四十餘萬石坐食民租甚非善計皆不見聽

大金國志曰金制凡用師征伐之會上自大元帥中自萬戶下自百戶其於飲酒會食一切起居動止之事畧無間別所以上下通情無閉塞之患疑慮之端國有大事適野畫灰而議自卑者先議畢即漫滅之不聞人聲軍將大行會而飲使人獻策主帥聽而決擇焉其合者即命為特將任其事暨

師還戰勝又大會問其有功者隨功高下支賞舉
以示衆薄則增之按此史稱其用兵無敵有以哉
元初有蒙古軍特默齊軍既平中原有漢軍

蒙古軍皆國人特默齊軍則諸部族也其法家有男
子十五以上七十以下無衆寡盡僉為兵十人為一
牌設牌頭上馬則備戰鬥下馬則屯聚牧養孩幼稍
長又籍之曰漸丁軍既平中原發民為卒是為漢軍
或以貧富為甲乙户出一人曰獨户軍合二三而出

一人則為正軍戶餘為貼軍戶或以男丁論嘗以二十丁出一卒至元七年十丁出一卒或以戶論二十戶出一卒而限年二十以上者充士卒之家為富商大賈則又取一人曰餘丁軍至十五年免或取匠為軍曰匠軍或取諸侯將校之子弟充軍曰質子軍又曰圖爾哈軍是皆多事之際一時之制天下既定嘗為軍者定入尺籍伍符不可更易詐增損丁產者覺則更籍其實而以印印之病死戍所者百日外役次

丁死陣者復一年貧不能役則聚而一之曰合併貧
甚者老無子者落其籍戶絕者別以民補之奴得縱
自便者俾為其主貼軍其戶逃而還者復三年又逃
者杖之投他役者還籍其繼得宋兵號新附軍又有
遼東之乂軍契丹軍女直軍高麗軍雲南之寸白軍
福建之畬軍則皆不出戍他方者蓋鄉兵也又有以
技名者曰砲軍弩軍水手軍應募而集者曰達爾罕
軍其名數則有憲宗二年之籍世祖至元八年之籍

十一年之籍而新附軍有二十七年之籍以兵籍係軍機重務漢人不閱其數雖樞密近臣職專軍旅者惟長官一二人知之故內外兵數之多寡人莫有知之者

太宗元年始僉軍

每一牌子僉軍一名限年二十以上三十以下者充仍定立千戶百戶牌子頭其隱匿不實及知情不首并隱匿藏逃役軍人者皆死

六年萬戶史天澤請以中戶為軍上下戶為民著為定籍

臣等謹按傳言太宗即位議立三萬戶分統漢兵天澤適入覲命為真定河間大名東平濟南五路萬戶又言減金後天澤還真定時政煩賦重民多貸負天澤既為設處代償又請以中戶為軍上下戶為民著為定籍境內以寧據此則中戶為軍之制疑止就天澤所轄真定等五路言之未必盡行

於他路也

七年七月僉宣德西京平陽太原陝西五路人匠充軍
命各處通驗丁數每二十人出軍一名

八年七月詔燕京路保州等處每二十戶僉軍一名令
塔布伊爾統領出軍真定河間邢州大名太原等路除
先僉軍外於新籍民戶數內每二十丁起軍一名亦令
屬塔布伊爾領之

十三年八月諭總管萬戶劉哈瑪爾元籍諸路民戶僉

軍因近年蝗旱往往在逃今後止驗見在民戶僉軍仍命逃戶復業者免三年軍役

憲宗四年初籍新軍

至六年春又從世祖之請續僉內郡漢軍

世祖中統元年六月詔罷解鹽司軍百人

初解鹽司元籍一千鹽戶內每十戶出軍一人後阿勒達爾倍其役帝以重困其民罷之

三年正月命匠戶為軍者仍為軍其軍官當考第富貧

存恤無力者

二月元籍軍竄名為民者命有司還正之

三月括穆蘇愛滿輝和爾伊囉勒昆達實密等戶丁為兵又括北京鷹坊等戶丁為兵蠲其賦又於平陽太原僉見任民官及捕鷹坊人匠等軍

時討李璫故也

四年二月詔統軍司及管軍萬戶千戶各官令各以子弟入朝充圖爾哈

此遵太祖之舊制也其制萬戶圖爾哈一名馬十匹
牛二具種田人四名千戶見管軍五百或五百以上
者圖爾哈一名馬六匹牛一具種田人二名雖管軍
不及五百而家富强子弟健壯者亦如之萬戶千戶
子弟充圖爾哈者挈其妻子同至從人不拘定數馬
匹牛具定數外增餘者聽若有貧乏不能自備者於
本萬戶內通行津濟起發不得科及衆軍其無親子
或幼弱未成人者以弟姪充俟其子年十五即交換

不得隱匿代替亦不得妄稱貧乏

五月立樞密院

凡蒙古漢軍並聽節制統軍司都元帥府除遇邊面緊急事務就便調度外其軍情一切大小公事並須申覆合設鄂囉官並從樞密院設置

至元二年六月詔樞密院臣各路出征逃亡漢軍及貧難未起戶并投下隱匿事故者一槩發遣應役

至十一月又詔事故貧難軍不堪應役者以兩戶三

戶合併正軍一名其丁單力憊者許僱人應役三年
七月又詔州縣招集逃亡軍限百日詣所屬陳首原
其罪貧者併戶應役

又勅行院及諸軍將校卒伍須正身應役違者罪之

三年七月添內外巡軍

外路每百戶選中產者一人充之其賦令餘戶代輸

後免代輸

在都增武衛四百

臣等謹按此即兵志內弓手一門之事也餘詳郡

國兵後弓手條下

董文炳傳曰帝嘗召河南等路統軍副使董文炳
密謀欲大發河北民丁文炳曰河南密邇宋境人
習江淮地利宜使河北耕以供軍河南戰以闢地
俟宋平則河北長隸兵籍河南削籍為民如是為
便從之

臣等謹按此是至元三四年間事而傳中不書何
年故附志於此

是年籍高麗民三百人為兵

四年正月僉蒙古軍戶二丁三丁者出一人為軍四丁五丁者二人六丁七丁者三人

五年二月詔諸路鄂囉無隸總管府別設總押所官聽樞密院節制

十月定長軍之官不得侵漁士卒違者論罪

臣等謹按董文炳傳載文炳言於帝曰將校素無俸給連年用兵至有身為大校出無馬乘者帝始

頒將校俸錢以秩為差此事在至元三年之後七
年之前傳中不確言是何年志中亦不載頒俸之
事以此五年十月事度之疑是時已定俸錢故有
侵漁之禁也

六年十月詔逃軍未獲者令其次親丁代役身死者亦
令親丁代補無親丁則以少壯驅丁代之

七年三月定軍官等級萬戶千戶百戶總把以軍士為
差

七月分揀隨路砲手軍

始太祖太宗征討隨路取發攻破州縣招收鐵木金
火等匠充砲手管領出征憲宗二年俱作砲手附籍
至帝中統四年揀定除正軍當役餘戶與民一體當
差後為出軍正戶煩難至元四年取元充砲手民戶
津貼其間有能與不能影占不便至是分揀之

九年五月勅諸路軍戶驅丁除至元六年前從良入民
籍者當差七年後凡從良文書寫從便為民者亦如之

餘雖從良並令津助本戶軍役

臣等謹按驅丁亦名驅奴乃軍戶家之奴僕也考之於志其出為民者以從良文書為據如此條所載是也紀於此事但書除至元六年前從良入民籍者當差不如志之明備又考李呼喇濟傳載其為夔府路招討使時奏蒙古漢軍多非正身半以驅奴代宜嚴禁之則知傭奴代軍亦軍政中之弊故至十五年五月又申嚴其禁云

十二月命府州司縣達嚕噶齊及治民長官不妨本職兼管諸軍鄂囉

十年三月勅樞密院襄陽熟券軍并城居之民仍居襄陽給其田牛生券軍分隸各萬戶翼

至七月勅樞密院襄陽生券軍無妻子者發至京師仍益兵衛送其老疾者遣還家九月襄陽生券軍至都免死聽自立部伍俾征日本仍於蒙古漢人內選官率領之十二年三月詔隨處所置襄陽生券軍之

為農者或自願充軍具數以聞十五年三月詔遣官
招宋生熟券軍堪為軍者月給錢糧不堪者給牛屯

田

臣等謹按襄陽生熟券軍本宋軍也是年攻襄陽
克之呂文煥出降率將吏赴闕故此軍亦歸其十
五年三月之事志作十四年十二月且不如紀之
詳故從十五年紀文

五月禁無籍軍從大軍殺掠其願為軍者聽

後至十五年五月又申無籍軍擄掠之禁至十九年
六月招無籍軍給衣糧至二十一年八月御史臺臣
言無籍之軍頗從軍殺掠者初假之以張渡江兵威
今各持弓矢剽劫平民若不分隸各翼恐生他變詔
遣之還家至二十四年三月禁無籍自効軍擾民仍
籍充軍

是月詔諸路軍人有陣亡病死別無餘丁家小不能自
贍者於官倉內按月支糧養贍

十一年正月初立軍官以功升散官格

十二年三月遣官往遼東僉揀蒙古達魯噶齊千戶百戶等官子弟出軍

六月命招討司所屬乾討虜人為正軍

先是十年五月禁乾討虜人其願充軍者於萬戶千戶內結成牌甲與大軍一體征進至是月萊州酒稅官王貞等上言國家討平殘宋弔伐為事何嘗以賄利為心彼不紹事業小人

此句疑有誤字

貪圖貨利作乾討

虜名目侵掠彼地所得人口悉皆貨賣以充酒食之
費勝則無益朝廷敗則實為辱國其招討司所收乾
討虜人可悉罷之第其高下籍為正軍命各萬戶管
領征進一則得其實用二則正王師弔伐之名實為
便益從之至二十一年八月江東道僉事馬奉訓言
劉萬努乾討虜軍私相糾合結為徒黨或詐稱使臣
莫若散之各翼萬戶千戶百戶牌甲內管領為便有
旨令問衆軍衆軍皆言願令還家少息遂從之至十

六年樞密院奏曩者江南未附有從軍乾討虜之名
今宋已亡此等人公然劫奪驅掠人口深為民害合
行禁治若各處捉獲同強盜斷罪庶幾南方新附之
民得以安集

博囉罕傳曰至元十四年時江南新附尚多反側
詔募民能從大軍進討者使自為一軍聽節度於
其長而毋役於他軍制命符節皆與正同署樞密
院事博囉罕會寢疾乃附樞密董文忠奏曰今疆

土寢廣勝兵百萬指揮可集何假此無籍之徒彼
一踐南土則掠人貨財俘人妻孥仇怨益滋而叛
者將愈衆矣奏上召興疾賜坐與語帝大悟遂可
其奏凡所募軍皆罷

十四年正月詔上都隆興西京北京四路編民捕獵等
戶僉選丁壯軍二千人防守上都

中書省議從各路搭配二十五戶內取軍一名選善
騎射者充官給行資仍自備鞍馬衣裝器仗編立牌

甲差官部領赴役

十二月命收新附請糧等軍人為軍

樞密院奏收附亡宋州城新附請糧官軍人等軍官不肯存卹多逃散者乞招誘之命左丞陳巖等揀堪當軍役者收係充軍依舊例月支錢糧

臣等謹按此時尚有生券軍之事已詳前

十五年樞密院奏單丁或殘疾無人出軍任催信實人

代替

九月詔分揀諸路所括軍驗事力乏絕者為民其恃權豪避役者復為兵所遣分揀官及本府州縣官能核正無枉者升爵一級

諸軍戶投充諸侯王齊哩克昆人匠或託為別戶以避其役者復令為軍有良匠則別而出之

又減至元九年所括三萬軍半以為民其商戶餘丁軍並除之

初至元九年僉軍三萬止擇精銳年壯者不復問其

資產且無貼戶之助歲久多貧乏不堪樞密院臣奏
宜縱為民遂併為一萬五千又言至元八年於各路
軍之為富商大賈者一百四十三戶各增一軍號餘
丁軍今徃徃人死產乏不能充二軍乞免餘丁充役
制可

十二月樞密院議諸軍官在軍籍者除百戶總把權準
軍役其元帥招討萬戶總管千戶或首領官俱令再當
正軍一名

十六年正月罷五翼特默齊重役軍

五月淮西宣慰司請招諭亡宋通事軍列之行伍以備
征戍從之

初宋多招納北地蒙古人為通事軍遇之甚厚每戰
皆列於前行願効死力及宋亡無所歸朝議欲編入
版籍未暇也人人疑懼皆不自安至是從淮西宣慰
司昂吉爾之請招集之

八月詔漢軍出征逃者罪死且沒其家

十月召募有罪亡命之人充軍

壽州等處招討使李特爾格言使功不如使過始南宋未平時蒙古諸色人等因得罪皆亡命往依焉今已平定尚逃匿林藪若釋其罪而用之必能効力無不一當十者矣至次年七月詔招收私投亡宋軍人臣等謹按所謂亡命往依者似即前通事軍之類但彼為宋所招而去此則逃罪自去宋未必盡編為軍也

十七年四月勅軍戶貧乏者還民籍

七月詔江淮諸路招集達爾罕軍

初平江南募死士願從軍者號達爾罕屬之劉萬努
麾下南北既混一復散之其人皆無所歸率羣聚剽
掠至是命諸路招集之令部領如故聽范左丞李拔
都二人節制至十九年六月散定海達爾罕軍還各
營及歸戍城邑

臣等謹按達爾罕軍之事與前乾討虜軍之事約

畧相符皆以應募而集且皆屬劉萬努麾下而兵志總叙內止言應募而集者曰達爾罕軍不列乾討虜之名疑即一軍而有二名耳

十八年二月詔以刑徒減死者付實都為軍併貧乏軍人三萬戶為一萬五千取貼戶津貼正軍充役

至六月樞密院議正軍貧乏無丁者令富强丁多貼戶權充正軍應役其正軍仍為軍頭如故或正軍實係單丁者許傭僱練習之人應役丁多不得傭僱軍

官亦不得以親從人代之

臣等謹按此又與十五年九月之事相符疑有重複今姑依志文兩列之

四月定大小軍官合用支使軍人

管軍官都元帥二十人招討萬戶左右副元帥十五人總管千戶副招討各十人總把百戶各二人行省元帥都鎮撫七人招討萬戶府都鎮撫五人首領官元帥府招討司經歷各二人諸知事各一人

六月放乞赤所招獵戶七千為民

十九年四月拘括江南官豪隱匿逃軍

至五月元帥綦公直言乞黥逃軍仍使從軍從之

十月僉發漸丁軍士遵舊制家止一丁者不作數凡二

丁至五丁六丁之家止存一人餘皆充軍

十一月命以重囚充軍

中書省言天下重囚除謀反大逆殺祖父母父母妻

殺夫奴殺主因姦殺夫並正典刑外餘犯死罪者命

充征日本占城緬國軍從之

二十年二月命各處行樞密院造新附軍籍冊

時濟寧路總管胡祇遘上八事於樞府言軍政曰役
重曰逃戶曰貧難曰正身入役曰偽署文牒曰官吏
保結曰有名無實曰合併偏頗樞府是之以其言著
為定法

六月從丞相巴延議以所括宋手號軍八萬三千六百
人立牌甲設官統之

先是十九年六月命亡宋軍有手號及無手號者並聽為民至是乃括之

十月許阿實達軍以兄弟代役僉河西質子軍年及丁者充軍

是月定出征軍人亡命之罪

為首者斬餘減死一等

二十一年四月籍江南鹽徒軍歲匿者有罪

八月籍亡宋手記軍

宋時有手記軍死則以兄弟若子承代至是命依漢軍例籍之母湮其手

臣等謹按手記軍當即手號軍後又有二十八年招宋時湮手軍亦當即此軍總以手上有湮文故名手號手記湮手也但以志中分載故未敢併入前二十年六月條下又考元典章載是時刷手號軍而百姓手上有雕青者亦刷之乃命差人分揀不係軍人不得刷充為軍

二十二年十一月給宋鹽軍衣糧使屯田自贍

御史臺臣言昔宋以無室家壯士為鹽軍內附之初
有五千人除征占城運糧死亡者今存一千一百二
十人此徒皆性習凶暴民甚苦之宜給以衣糧使
屯田自贍庶絕其擾從之十二月江淞省募鹽徒為
軍得四千七百六十六人選軍官麾下無士卒者相
參統之以備各處鎮守二十三年八月又招集宋鹽
軍

十二月嚴立軍籍條例選壯士及有力之家充軍

舊例丁力强者充軍弱者出錢故有正軍貼戶之籍行之既久而强者弱弱者強籍亦如故其同戶異居者私立年期以相更代故有老稚不免從軍而強壯家居者至是革焉又省府議軍人身死其子亦合充軍比及漸長成丁官為養濟月支口糧四斗至二十四年樞密院臣又言諸軍貼戶有正軍已死者有充工匠者放為民者有元係各投下戶回付者似此歇

開一千三百四十戶乞差人分揀貧富定貼戶正軍制可至二十八年八月中書省議新附軍人無貼戶者依例正身六斗米一斤鹽家口四斗米蒙古漢軍五斗米一斤鹽

二十三年三月交趾出征軍人鄂囉內除免和催和買一切雜泛差役

二十五年命北征漢軍分番放土著為令

時方討納顏餘黨尚書左丞李庭奏令漢軍之力困

於北征若依江南軍每歲二八放散以次番上甚便
帝可其奏著為令

二十八年七月遣官招集宋時涅手軍可充兵者八萬
三千六百人以蒙古漢人宋人叅為萬戶千戶百戶領
之

十月禁特默齊軍交庫特齊代役

十二月籍特默齊等六萬戶成丁者為兵

三十年八月詔軍人支請衣裝皮衣隔二年支帛隔一

年支布每年支

至成宗大德四年省府議軍人夏衣不過四月冬衣不過十月依例放支

三十一年正月禁管軍官差撥造作局院軍匠充軍

臣等謹按此下二條皆見元典章言是時成宗已即位矣考之元史世祖於正月壬子朔即不豫癸酉崩而成宗在北軍遣使告哀至四月壬午始至上都正月二月方當交會之間未可即謂成宗之

新政也

二月體問貧難軍戶單丁貧難無力不能當軍者令歇役

成宗元貞二年二月詔蒙古軍以家奴代役者罪之仍令其奴別入兵籍以其主資產之半畀之軍前敢有縱之者罷其職又括蒙古戶漸丁以充行伍

五月命諸行省非奉旨毋擅調軍

大德元年十月以各處軍官差占正軍作祇候伊喇知

印等名色定例禁治

十二月定逃軍窩主罪犯人減罪二等科斷

三年正月拘刷新附軍人弟男

樞密院奏亡宋新附軍人招收未盡到官見役軍內
逃竄數多是管軍官不行存恤以致在逃管民官不
肯用心拘刷容情隱庇乞降旨招諭詔各處行省差
官分頭招誘新附生熟券軍廂軍土軍通事馬軍并
身故手額號正軍弟男限一百日赴所在官司出首

免罪責付本省鎮守軍官幫支糧鹽葷菜養贍如限
外不首因事發露有人首告依逃軍例斷罪各路官
吏及權豪之家隱蔽占役者依條斷罪仍命各道廉
訪司嚴行體究至十二月定新附軍籍之內在逃及
身死軍人并官豪隱占諸處不曾當差有手額號禁
軍分間當軍

詔諸行省謹視各翼病軍

中書省議諸翼屯戍軍人果有病疾合於本名應請

月糧內減半支付新米煎粥養病至武宗至大二年
江陵路錄事李貞請病軍死者比養濟院貧子例給
棺埋瘞各處正官親臨提調

九月罷括宋手號軍

四年六月詔各省自今非奉命毋擅役軍

至十一年六月

武宗

樞密院請以軍二千五百人繕治

上都鷹坊及諸官廨有旨自今非奉旨軍勿輒役至

至大四年正月

仁宗

禁百官役軍人營造及守護私第

六年正月詔千戶百戶等自軍逃歸先事而逃者罪死
敗而後逃者杖而罷之沒入其男女

八年三月詔軍官擅離所部者悉遣還翼違者論如律
軍人不告所部私歸者杖而還之

武宗至大二年十月贖江南富民子為軍

平章政事約蘇言江南平垂四十年其民止輸地稅
商稅餘俱無與其富室有蔽占王民奴使之者動輒
百千家有多至萬家者其力可知乞自今有歲收糧

滿五萬石以上者令石輸二升於官仍質一子而軍
之其所輸之糧半入京師以養御士半留於彼以備
凶年帝如其言行之

臣等謹按此制之擾民殊甚後仁宗初即位尚書
省以平章約蘇等變亂舊章流毒百姓伏誅

四年四月

時仁宗
已即位

拘收下番將校不典兵者虎符銀牌

仁宗皇慶元年正月勅軍不滿五千者勿置萬戶

延祐二年五月禁軍官不得代替軍役

有受錢代替本管軍人空名者合驗入已錢數以枉法科罪若令兄弟子姪驅丁代替者不曾歇役難議計贓量名數多寡科罪

英宗至治元年樞密副使吳元珪等上軍民政十餘事詔行之

元珪與知院事特穆爾布哈上軍民之政十餘事大抵言諸王近侍不可干軍政管軍官吏不可漁取軍戶軍官之才者當遷其職有司賦役當務均一而軍

民不可有所偏軍官襲職惟傳適嗣而支庶不可有
所亂帝並嘉納即降旨施行之

泰定帝泰定元年八月勅樞密院役軍凡三百人以上
奏聞

文宗天歷元年九月募勇士從軍

至順元年九月覈實諸衛軍戶物力

二年二月勅特默齊軍士歲以五月十日遷處山後諸

州

命番休各衛漢軍十之二以三月一日放遣

順帝至正十二年募瀕海鹽丁為軍

先是七年十一月兩淮鹽運使宋文瓚上言江陰通
泰江海之門戶而鎮江真州次之國初設萬戶府以
鎮其地今戍將非人致使賊艦往來無常集慶花山
劫賊才三十六人官軍數萬不能進討反為所敗後
竟假手鹽徒雖能成功豈不貽笑宜亟選智勇以任
兵權以圖後功不聽至是丞相托克托討徐州賊以


官軍不習水土募瀕海鹽丁為軍乃起遷遼魯曾淮南宣慰使領征討事遣其募鹽丁五千人從征

十四年五月募寧夏善射者及各處回回珠嘉殷富者赴京師從軍

二十七年八月知大撫軍院事鄂勒哲特穆爾上言軍政

鄂勒哲特穆爾言大撫軍院專掌軍機今後迤北軍務仍舊制樞密院管其餘內外諸王駙馬各處總兵

行省行院宣慰司一應軍情不許隔越徑行移大撫
軍院又言諸軍將士有能用勅力建立奇功者請所
賞宣勅依常例外加以忠義功臣之號從之



欽定續文獻通考卷一百二十一

欽定四庫全書

史部

欽定續文獻通考卷一百三十三

給事中^臣陳化龍覆勘

總校官內閣中書^臣孫溶

欽定四庫全書

欽定續文獻通考卷一百二十二

兵考

兵制

明制自京師達於郡縣皆立衛所外統之都司內統於五軍都督府而上十二衛為天子親軍者不與焉征伐則命將充總兵官調衛所軍領之既旋則將上所佩印官軍各回衛所益得唐府兵遺意

公侯伯皆領都督以統禁兵後又以文臣或內臣提督京營外設衛所都指揮使司以轄鎮守之軍征伐則又設總兵副將叅將遊擊之屬文臣統兵者或為經畧或為總督巡撫及兵備道清軍同知之屬

臣等謹按都督有三等曰左右都督都督同知都督僉事皆以公侯伯為之是為世官副都督則流官矣明初勲臣尚充叅遊後止充兩廣湖廣漕運三總兵又次第皆革總兵或掛將軍印或不掛印

皆曰總兵征伐之事公侯伯充總兵名曰掛印將軍其在外鎮守地方武臣原無掛印自洪熙元年始頒各鎮總兵叅將佩印初制總兵無專官有事則命將事已即歸後因邊境多事遂留鎮守其鎮守內臣則始永樂時遼東開原及山東等處而自後遂多添設嘉靖時盡數取回邊境肅清沿及末季京營全任中官外鎮必設監視一代弊政莫此為甚

太祖辛丑歲三月改樞密院為大都督府節制中外諸
軍事

先是太祖自和州渡江所下之地置各翼元帥府以
總制軍民丙申六月既下集慶置行樞密院於太平
總制各翼軍馬己置帳前五翼元帥府五部都先鋒
至是改為大都督府以兄子文正為之而在外者尚
仍其舊尋以其權太重設左右都督都督同知都督
僉事

癸卯二月申明將士屯田之令

臣等謹按帝於戊戌冬立管領民兵萬戶府諭省
臣曰古者寓兵於農有事則戰無事則耕暇則講
武今所定郡縣民間武勇之才宜精加簡拔編緝
為伍立民兵萬戶府領之俾農時則耕暇則練習
庶幾寓兵於農之意後洪武二十一年九月勅天
下衛所屯田歲得糧五百餘萬石二十五年二月
詔天下衛所軍以十之七屯田蓋初制在外兵馬

盡是屯軍官俸兵糧皆於是出帝嘗曰吾養兵百萬要不費百姓一粒米故京師屯田有以遠田三畝易城外民田一畝者一代屯政此其初制今因已見田賦考故述其緣起如此

丁未三月罷諸翼統軍元帥置十七衛親軍指揮使司十七衛曰武德龍驤豹韜飛熊威武廣武興武英武鷹揚驍騎神武雄武鳳翔天策振武宣武羽林

洪武元年立軍衛法

自京師達於郡縣皆立軍衛度天下要害之地係一
郡者設所連郡者設衛大率以五千六百人為一衛
千一百二十八人為一千戶所一百一十二人為百
戶所每百戶設總旗二名小旗十名大小聯比以成
軍

四月禁宦官預政典兵

十二月定優給將士例

先是乙巳七月令從渡江士卒被創廢疾者養之死

者贍其妻子至是定為例

四年閏三月收故元舊軍隸北平諸衛

先是命平章胡廷美招集王已拜散亡士卒凡占籍在元年者聽為民二年以後者籍為軍至是命侍御史商嵩往山東北平收故元五省八翼漢軍按籍得十餘萬戶每三戶出一分隸北平諸衛十二月籍方國珍所部溫台慶元三府軍士及無田種之民嘗充船戶者十一萬餘人隸各衛為軍是後所招集者或

留京師或發往各衛所守禦隨宜分隸焉五年李文忠獲故元軍士千餘令舊校李已延布哈領之以隸羽林衛六年勗復招集王已拜將卒簡壯勇者為駕前先鋒

五月造用寶金符及調發走馬符牌

用寶符為金牌二中書省大都督府各藏其一有詔發兵省府以牌入內府出寶用之走馬符牌以鐵為之共四十金字銀字者各半藏之內府有急務調發

使者佩之以行尋改金牌為金符上篆為陰陽文仍

增金符二字

金符之制濶三寸長一寸五分上鉞二

帶走馬符牌之制濶二寸五分長五寸上鉞二飛龍
下鉞二麒麟牌首為圓竅貫以紅絲繼文曰符令所
至即時奉行
違者必刑凡軍機文書自大都督中書省長官外

不許擅奏有詔調軍省府同入覆奏然後納符請寶
其有不行約會者以姦臣論

十一月定所管逃軍降罰之例

初垛集令行民出一丁為軍衛所無缺伍且有羨丁

至洪武三年十一月軍士逃亡四萬七千九百餘人
詔天下諸司追攝之至是又以逃亡者衆請立法懲
戒凡小旗逃所隸三人降為軍上至總旗千戶百戶
皆視逃軍多寡奪俸降革其從征在外者罰尤嚴十
三年五月復申明之

兵志曰是年都督府奏京師士卒之數凡二十萬
七千八百二十五人

五年二月令凡一家父子兄弟從軍者免其父兄

至二十三年正月命一戶二軍者免一人為民次年
詔歸附達軍及邊民為軍無丁男者除其後三十一
年惠帝即位詔興州諸衛軍全家在伍者免一人天
下衛所軍單丁者放為民

是年頒律令於各衛

八年改在京留守都護為留守衛指揮使司在外都衛
為都指揮使司

先是既立內外衛所而洪武三年升杭州江西燕山

青州四衛為都衛後置河南西安太原武昌四都衛
以統屬諸衛至是悉改為都指揮使司北平陝西
山西浙江江西山東四川福建湖廣廣東廣西遼東河
南凡十三甘州大同福建行都指揮使司三俱隸大
都督府至十五年增置貴州雲南兩都司

臣等謹按兵志作行都指揮使司二甘州大同而
已無福建實錄則云行都司三甘州大同福建續
通鑑綱目三編則作行都司三西安大同建寧西

安當即甘州建寧當即福建考兵志於前軍都督府所屬各衛內原以福建都司福建行都司兩列之則此之是三而非二明矣

十三年正月改大都督府為五軍都督府

帝懲胡惟庸之叛革中書省因改大都督府為五府隸外衛於都司而都司及內衛各以其方隸五府惟親軍不屬遂為定制五都督總兵籍而不與調發兵部得調發而不治兵後定天下都司衛所共計都司

二十一留守司二內外衛四百九十三守禦屯田羣

牧千戶所三百五十九儀衛司三十三

自儀衛司以下舊無後以

次添設

宣慰使司二招討使司二宣撫司六安撫司十

六長官司七十

原五十九

番邊都司衛所等四百七

後作四百

六十

三

臣等謹按太祖之立五府在南京至成祖永樂十

八年則又立五府於北京而南京之衛多調往北京志中於南北五府所統諸衛所皆分列之今為

叅列於後以便檢閱

洪武時南京左軍都督府統在京留守左衛鎮南衛
水軍左衛驍騎右衛龍虎衛英武衛瀋陽左衛瀋陽
右衛在外浙江都司遼東都司山東都司
諸衛俱詳
史志不再
述

永樂時北京左軍都督府統在京留守左衛鎮南衛
驍騎衛龍虎衛瀋陽左衛瀋陽右衛
俱從南
京分調 在外三
都司同前

洪武時南京右軍都督府統在京虎賁右衛留守右
衛水軍右衛武德衛廣武衛在外雲南都司貴州都
司四川都司陝西都司廣西都司

永樂時北京右軍都督府統在京留守右衛虎賁右

衛武德衛

俱從南
京分調

在外直隸宣州衛

舊無
後設

陝西都司

陝西行都司

洪武十二年添設
而分府在十三年則前段當已列入而

按添設在十二年

兵志中却
未列也

四川都司土官四川行都司

舊無
後設

土官廣

西都司雲南都司土官貴州都司土官

洪武時南京中軍都督府統在京留守中衛神策衛
應天衛廣洋衛和陽衛牧馬千戶所在外直隸揚州

衛和州衛

後改寧夏
中屯衛革

高郵衛淮安衛鎮海衛滁州衛

太倉衛泗州衛壽州衛邳州衛大河衛沂州衛金山

衛新安衛蘇州衛儀真衛徐州衛安慶衛宿州千戶

所中都留守司鳳陽右衛鳳陽中衛皇陵衛鳳陽衛

留守左衛留守中衛長淮衛懷遠衛洪塘千戶所河

南都司

永樂時北京中軍都督府統在京留守中衛神策衛

應天衛和陽衛牧馬千戶所

俱自南
京分調

蕃牧千戶所

添設

在外直隸同前各衛而宿州亦陞為衛又分舊屬河

南都司之潼關歸德武平三衛又添設廬州鎮江六

安徐州左建陽五衛又有汝寧以下至莒州等十六

千戶所

具詳史志
不備列

中都留守司

與前
同

河南都司

洪武時南京前軍都督府統在京天策衛

後分為保
安衛及保

安右
衛

龍驤衛豹韜衛龍江衛

後改龍
江左衛

飛熊衛在外直

隸九江衛湖廣都司福建都司福建行都司江西都司廣東都司

永樂時北京前軍都督府統在京留守前衛龍驤衛

豹韜衛

俱從南京分調
衛志文於南京前府中不載

在外直隸

同湖

廣都司土官湖廣行都司興化留守司福建都司福建行都司江西都司廣東都司

洪武時南京後軍都督府統在京橫海衛鷹揚衛興

武衛江陰衛蒙古左衛

革

蒙古右衛

革

在外北平都

司北平行都司

後為大寧都司

山西都司山西行都司北平

三護衛

後俱為親軍

山西三護衛

後俱革

永樂時北京後軍都督府統在京留守後衛鷹揚衛

興武衛

俱自南京分調衛志文於南京後府中不載

大寧中衛大寧

前衛會州衛

舊隸北平行都司又有從北平山西等衛改調及新添設者

富峪衛

寬河衛

舊大寧後衛

神武左衛神武後衛

改昭陵衛

忠義左右

前後四衛義勇中左右前後五衛武成中衛蔚州左

衛在外直隸

舊為北平都司有三護衛後俱親軍其不係北平舊衛者俱永樂以後添設

薊州衛真定衛永平衛山海衛遵化衛

以上北平舊衛

密雲

中衛後衛

以舊密雲一衛分

開平中屯衛興平左屯右屯中

屯前屯後屯五衛延慶衛

舊為北平都司居庸關千戶所後改

東勝左

右二衛鎮朔衛涿鹿衛

舊為河南寧國衛

定邊衛神武右中

二衛忠義中衛盧龍衛武清衛撫寧衛德州衛寧山

衛

舊屬河南都司

大同中屯衛瀋陽中屯衛定州衛

以上舊為北平

山東山西河南等處衛所永樂時調改

天津衛

以下添設

天津左衛天津右

衛

舊青州左護衛

通州左衛右衛涿鹿左衛中衛河間衛潼

關衛

舊屬河南都司

德州左衛

又有梁城至蒲州十三千戶所具詳史志不備述

大

寧都司萬全都司山西都司山西行都司

自北京建五府後凡南京所屬之衛仍皆分隸北京

五府

按史志又載永樂後南京五府所屬之衛名皆與前相仿則知永樂時所云分調者當是分其

半而調北京非南京遂全無此衛也內左軍中較舊添龍虎左衛舊為成都右護衛宣德六年改又有龍江右衛亦舊所無前軍中較舊添豹韜左衛舊為成都中護衛亦宣德六年改而在外所統之各都司則皆不載蓋自改建後在外之都司自專屬北五府不得仍屬南五府矣

臣等謹按以上所列南北五府所屬之各衛皆以

洪武永樂分載者以見重定兵制之大綱也至其中衛所之添革改調及各處土官屬之統轄者原自永樂而後隨時損益不專成祖一朝蓋史志固統全代而列之也

又按除親軍外凡各衛所俱分屬五府矣惟武功中左右衛以匠役隸工部永清左右彭城三衛皆無所屬其後諸陵設衛不隸五府亦不稱親軍五府以中左右前後為序南以總兵坐中府北以總

兵坐後府

孫承澤春明夢餘錄曰兵部掌兵政而軍旅征伐則歸之五軍都督府兵部有出兵之令而無統兵之權五軍有統兵之權而無出兵之令至將屬於五府而兵又總於京營合之則呼吸相通分之則犬牙相制

五月詔軍民已有定籍有以民為軍者禁之

取兵有從征有歸附有謫發從征者諸將所部兵既

定其地因以留戍歸附則勝國及僭偽諸降卒謫發以罪遷隸為兵者其軍皆世籍

臣等謹按律嚴人戶以籍為定而軍民遂分會典云官軍頭目無得巧立名色徑行勾提百姓充軍民戶亦不得詐稱各官軍人貼戶躲避差役洪武十五年有戍卒言故元將校宜取為兵帝以版籍已定豈可復擾命徙其卒於他衛可謂無二三考矣考王圻續通考中載軍籍抽丁議一篇內言取

兵之途有從征有歸附有謫發有籍選籍選者拔之編戶者也當即所謂民兵其制起於後非洪武時初制

十五年三月頒軍法定律

凡管軍指揮千戶到任務必先知衛所官旗軍馬之數每月三次閱視違者奪其俸及兵衛隊伍老幼優給與宮禁守禦之令凡二十九條

十一月榜諭天下都司不得擅興營建私役軍士

臣等謹按至十七年正月詔天下城隍俱令軍士修理勿得役民二十六年四月又詔凡有劾修頒奏聞差人相度准令守禦或所在人民築造蓋以公事營建則以兵代民惟不得私役耳然其端既開安得盡以公而不以私厥後京營兵既困於工役而在外者亦多役軍士矣

十六年九月命給事中及國子生各衛舍人分行天下清理軍籍

臣等謹按此明代清理軍伍之始是時兵政脩明
無勾擾之弊迨其後法日弛而弊日滋勾軍之害
不可勝舉而兵亦日弊矣

十九年六月撫卹從征軍士

詔士卒戰傷者除其籍復其家土軍賜復三年改為
貼戶死亡者復十年其除籍者仍復三年將校陣亡
其子世襲加一等

二十一年六月諭武臣存卹軍士仍賜軍士護身勅

時帝聞世襲武官有苛刻不恤軍士者特勅諭戒之
又述軍士始終艱難之故與夫撫綏愛養之道為護
身勅頒示軍士永為遵守至八月御製八諭飭武臣
一曰守邊之將撫軍以恩二曰邊境城隍務宜高深
三曰修築城池葺理以漸四曰操練軍士習於閒暇
五曰軍士頗舍勤於點視六曰體念軍士勿得加害
七曰事機之會同僚盡心八曰沿海衛所嚴於保障
十月又製保身勅賜武臣

二十一年令衛所覈實軍伍有匿己子以養子代者不許是年秋令衛所造軍戶籍又置軍籍勘合

帝以軍伍有缺遣人追取往往鬻法擾民乃詔自今衛所將逃故軍姓名鄉貫編成圖籍送兵部照名行取不許差人又詔天下郡縣以軍戶類造為冊具載丁口之數取丁則按籍追之無丁者止又命兵部置軍籍勘合遣人分給內外衛所軍士謂之勘合戶由其中開寫從軍來歷調補衛所年月及在營丁口之

數如遇點圈以此為驗底簿則藏於內府

兵志曰凡軍衛掌於職方而勾清則武庫主之有所勾攝自衛所開報先覈鄉貫居址內府給批下

有司提本軍謂之根捕提家丁謂之勾補

按圖書集成所

載凡內外勾解到部其定衛斷發及遇缺投充收補與重局存卹等項屬職方司其根捕勾補及清理挨查改編等項屬武庫司若職間有恩卹開伍方司有首補者即行武庫司住勾

者洪武中令應補軍役生員遣歸卒業宣德中上虞人李志道充楚雄衛軍死其孫宗舉宜繼時已

中鄉試尚書張本言於帝得免如此者絕少戶有
軍籍必仕至兵部尚書始得除軍士應起解者皆
僉妻有津給軍裝解軍行糧軍丁口糧之費其冊
單編造皆有恒式初定戶口收軍勾清三冊嘉靖
中又編四冊曰軍貫曰兜底曰類衛類姓其勾軍
另給軍單蓋終明世於軍籍最嚴然弊政漸荒而
擾民日甚矣

二十二年三月令天下軍丁習匠藝

帝以軍衛營作勞民命各衛所置局每百戶選四人以正軍之弱者分習技藝

二十三年復遣官清理天下將卒部伍

臣等謹按至二十五年計內外武官兵馬之數京官二千七百四十七員軍二十萬六千二百八十人馬四千七百五十一匹外官萬三千七百四十二員軍九十九萬二千一百五十四人馬四萬三百二十九匹可謂盛矣自後則惟有遞減耳

二十四年定勾補軍士之令

令採集軍故戶止一丁者勾有丁貼戶起解軍去原籍遠者解京該府遣人押送若路順及去京遠者從便解發

二十六年三月定衛所額軍收補軍士及老病軍人除豁之例

是時定凡天下都司并衛所城池軍馬數目以諸司職掌刊布中外凡內外衛所軍士皆有定數其勾解

逃故補役戶丁兌換老疾除豁絕戶皆以定例行之
二十七年四月命罪謫充軍者為恩軍

二十九年十月選屯田軍士更代京衛老疾士卒

三十年四月定武官役軍之制

帝以武官多私役軍卒踰法制命禮部考定其從人
額數指揮使同知僉事四人千戶三人百戶以下二
人皆於正軍伍內取用三日輪番更直下直則歸隊
伍操練衛所值廳六人守門二人守監四人守庫一

人止選老軍充之歲一更著為令

成祖入立重定撥集軍更代法

洪武中戶三丁以上撥正軍一名別有貼戶正軍故貼戶丁補役至是令正軍貼戶輪流更代貼戶止一丁者免之當軍之家免一丁差役已令坐勾軍有見任官及生員吏典等戶止三丁者免勾四丁以上者以一丁補伍

臣等謹按此事兵志止書成祖即位所更定實錄

則云洪武三十一年十二月事考太祖於是年五月崩惠帝嗣立而靖難兵起所稱洪武三十二年實建文元年七月則當三十一年十二月尚未稱兵何得即定制度蓋永樂時所脩之實錄大抵非信史也

永樂元年二月設北京留守行後軍都督府以衛六十
一守禦千戶所三隸之

閏十一月始命內臣出鎮及監京營軍

宦官傳曰太祖頒祖訓內官不得兼外臣文武衙
常鑄鐵牌置宮門內曰內臣不得干預政事預者
斬勅諸司不得與文移往來建文帝嗣位御內臣
益嚴詔在外稍不法許有司械聞及燕師逼江北
內臣多逃入其軍漏朝廷虛實文皇以為忠於已
即位後遂多所委任永樂元年内官監李興奉勅
往勞暹羅國王三年遣太監鄭和帥舟師下西洋
八年都督譚青營有內監王安等又命馬靖鎮甘

肅馬騏鎮交趾十八年置東廠令刺事蓋明世宦
官出使專征監軍分鎮刺臣民隱事諸大權皆自
永樂間始

二年四月更定天下衛所屯田守城軍士

視其地之夷險要僻以量人之屯守多寡臨邊而險
要者則守多於屯在內而夷僻者則屯多於守地雖
險要而運輸難至者亦屯多於守

五年六月嚴禁衛所官私役軍士

七年五月置邊城調軍勘合

帝以邊戍調遣止憑勅書慮或有詐乃以勇敢鋒銳
神奇精壯強毅克勝英雄威猛十六字編勘合百號
制勅調軍及遣將比號同方准行

十二年四月頒軍中賞格

賞功之制太祖時大賞平定中原征南諸將及雲南
越州之功賞格雖具然不豫為令惟洪武二十九年
命沿海衛所指揮千百戶獲倭一船及賊者升一級

賞銀五十兩鈔五十錠軍士水陸擒殺賊賞銀有差
永樂時以將士久勞命禮部依太祖升賞例參酌行
之其能立奇功者升二級頭功升一級次功不升初
洪武中定諸司職掌凡軍功賞賜之等有三曰加賞
曰給賞曰量賞其賞之輕重次第率臨時取旨亦不
豫為令至是再舉親征詳定賞罰號令又立功賞勘
合定四十字曰神威精勇猛強壯毅英雄克勝兼超
捷奇功奮銳鋒智謀宣妙畧剛烈効忠誠果敢能安

定揚名顯大勲編號用寶印綬監收貯應用其稽功
之法甚嚴凡交鋒之際突入賊陣透出其背殺敗賊
衆者敢勇入陣斬將奪旗者本隊已敗賊衆能救援
別隊克敵者受命能任其事出奇破賊成功者皆為
奇功齊力前進首先敗賊者前隊交鋒未決後隊向
前破賊者皆為頭功凡建立奇功頭功其親管頭目
即為報知妄報者治以重罪行營下營之時擒獲奸
細者升賞准頭功餘俱次功

十八年十一月建五軍都督府於北京其在應天者稱南京以各衛所分隸二京

時北京建在南諸衛多北調以孝陵濟川廣洋中水軍左右龍江左右江陰橫江天策英武飛熊廣武應天等衛留守南京神策鎮南驍騎瀋陽虎賁豹韜龍驤鷹揚興武龍虎武德和陽瀋陽右等衛調守北京留守中左右前後五衛官軍分守南北二京

臣等謹按其餘分轄各衛所之目已附詳洪武時

條下

又按兵志永樂十九年遷都後其京營之在南者
命中府掌府事官守備南京節制在南諸衛所洪
熙初以內臣同守備宣德末設叅贊機務官景泰
間增協同守備官成化末命南京兵部尚書叅贊
機務視五部特重

定三大營之制

京軍三大營一曰五軍一曰三千一曰神機其制皆

備於永樂時初太祖於京城內外置大小二場分教
四十八衛卒已分為五軍都督府成祖遷都增京衛
為七十二又分步騎軍為中軍左右掖左右哨亦謂
之五軍歲調中都山東河南大寧兵番上京師隸之
設提督內臣一武臣二掌號頭官二大營坐營官一
把總二中營坐營官一步隊把總各一左右掖哨官
如之又有十二營掌隨駕馬隊官軍設把總二又有
圍子手營掌操練上直叉刀手及京衛步隊官軍設

坐營官一統四司以一二三四為號把總各二又有
幼官舍人營掌操練京衛幼官及應襲舍人坐營官
一四司把總各一此五軍營之部分也已得邊外降
丁三千立營分五司一掌執大駕龍旗寶纛勇字旗
負御寶及兵仗局什物上直官軍一掌執左右二十
隊勇字旗大駕旗纛金鼓上直官軍一掌傳令營旗
牌御用監廬甲尚冠尚衣尚履什物上直官軍一掌
執大駕勇字旗五軍紅廬貼直軍上直官軍一掌殺

虎手馬輻及前哨馬營上直明甲官軍隨侍營隨侍
東宮官舍遼東備禦回還官軍提督內臣二武臣二
掌頭號官二坐司官五見操把總三十四上直把總
十六明甲把總四此三千營之部分也已征交趾得
火器法立營肄習提督內臣武臣掌頭官皆視三
千營亦分為五軍中軍坐營內臣一武臣一其下四
司各監鎗內臣一把司官一把總官二左右掖哨皆
如之又因得都督譚廣馬五千匹

當時謂之
譚家馬

置營名

五千下掌操演火器及隨駕護衛馬隊官軍坐營內
臣武臣各一其下四司各把司官二此神機營之部
分也居常五軍肆營陣三千肆巡哨神機肆火器
鎗即手大駕征行則大營居中五軍分駐步軍在內騎軍
在外騎外為神機神機外為長圍周二十里樵採其
中三大營之制如此

臣等謹按三大營之立明史無歲月可考據王圻
續通考云永樂八年北征始分步騎為五軍至二

十二年北征既歸京師則為五軍大營考是年四月帝發京師七月還至榆木川崩豈至此時師還始為立營乎蓋五軍本太祖舊制靖難師起及數次北征皆用其制以為征行而歲調中都山東等四處之兵來京隸之則十三年已有此詔其非二十二年始立為營明矣明史稿云八年北征分步騎為五軍既旋師五軍營之名遂不易然考五年初定交趾神機營立於此時而五軍營似尚當在

前其得降丁三千以為三千營當在立五軍之後
立神機之前昭代典則書於元年十月之下未知
是否幼官舍人營之外又有彈忠効義營掌操練
京衛報効舍人餘丁舍人營曰彈忠餘丁營曰効

義

兵志亦云二營
永樂時設後廢

國朝典彙云北征之時別選輕

騎為前哨以遊擊將軍督之又有驃騎神威鷹揚
輕車將軍之名分督精卒不隸五軍其番上之軍
始於永樂十三年而仁宗初年方著為令史志蓋

括始末言之耳

又按五軍營內之幼官舍人營者明初立君子舍人二衛選文臣子姪居君子衛武臣子姪居舍人衛晝則侍從夜則直宿更番此即勲衛之始也後不用文臣子姪故專言舍人營凡舍人承襲皆於五府試驗年二十以上方許比試一試不中食半俸再試不中降充軍蓋明初將材皆儲於此故其嚴如此神機營南京亦增設之

仁宗洪熙元年始命武臣一人總理營政

是年令軍戶重役者止併一處其丁盡戶絕者豁除之
其先為事充軍後為官者免補伍

閏四月整飭神機營缺伍

從陽武侯薛祿言選內地衛所軍士補之

四年二月令天下衛所軍士免原籍戶下一丁在營軍
餘亦免一丁

臣等謹按會典時以軍士征調當自備衣裝供給

為難故有此制至五年正月又詔馬軍戶內再免
一丁以助給之

令天下官吏軍旗公勦勾軍無蹤者豁免之

兵志作五年實錄在

四年
七月

尚書張本言中外衛所逃軍自洪武以來勾取未獲
者終無完期請行天下所屬官吏軍旗人等從公保
勘開豁從之六年令勾軍有親老疾獨子者編之近
地餘丁赴工逋亡例發口外為民者改為罰工一年

以示優恤八年免蘇州衛抑配軍百五十九人已食糧止令終其身者千二百三十九人先是蘇常軍戶絕者株連族黨動以千計知府况鍾言於朝又常州民訴受抑為軍者七百有奇故特勅巡撫周忱清理之

從平江伯陳瑄言也東南之卒由是因

十二月選京衛軍十萬隸五府

成國公朱勇言舊時五軍每軍步騎二萬人後調大同等處備禦今五軍總五萬七千餘人而神機諸營比舊亦少請令兵部如舊取補帝命於京衛選士卒十萬隸五軍訓練

六年七月編京衛軍士丁口籍

以軍伍不實限衛所官兩月內清理編丁口籍以五府官同科道二人理之以侍郎王驥總督驗實勘補

八年三月詔減軍衛在營餘丁

正軍外每軍留一餘悉遣歸已復以幼軍備操者不足三丁至七八丁者選一餘聽治生給軍裝正軍有故即令補伍毋再勾攝

實錄曰宣德五年工部尚書黃福上言足兵之道云今天下衛所之兵多有亡故有丁者追補之無丁者欠缺為今之計凡腹裏衛所缺者莫若以附近郡縣十丁以上田不及五十畝殷實民戶選補

其邊衛有缺以各處犯死罪者就近發補則士伍不空矣然又不可不養其銳必令所司免正軍之雜役使專操屯存戶下之老幼使治生產則有以養其生而又嚴禁私役掊克之害則於精銳之氣有益命兵部行之

臣等謹按兵志言宣德時都指揮司與布按並稱三司為封疆大吏而專閭重臣文武亦無定職世猶以武為重軍政修飭其後軍職冒濫為世所輕

內之部科外之監軍督撫疊相彈壓五軍府如贅疣弁帥如走卒蓋明之中葉而後其視武職直奴隸之惟輕其任故鄙其官軍政之不振此亦其一端也特附志於此

九年定平南方蠻賊賞例

三級以上及斬獲首賊俱升一秩餘加賞後至正德十六年定軍官部下斬百級者升署一秩三百級者實授一秩四百級者升一秩餘功加賞

十月榜諭邊境有願奮勇効力剿賊立功者許赴官自陳

臣等謹按以邊境言之自屬郡國事然有明一代召募之令始此故載入兵制時以阿台等援邊故然亦以見兵力之漸頓矣蓋兵政易敝而難修永樂宣德之間不過十餘年而振刷已難古人所以致謹於詰戎也

英宗正統元年分遣御史軒輶等清理天下軍政賜勅

遣之

二年十月命成國公朱勇大選京軍

勇言五軍營原操官軍調遣及逃故者多乞於屬衛
及親軍衛分并三都司官軍內選補十二月勇言奉
命選拔各營精銳官軍十五萬一千有奇欲將續選
行在錦衣衛等七十衛軍與之相兼編伍訓練然內
有守陵守衛供役上直者帝命守陵守衛各存其半
供役上直旗校隸錦衣衛官操其餘俱聽訓練補用

十四年九月

時景帝
已即位

遣御史十五人募兵

時幹拉將入寇兵部言適者各營精銳盡遣隨征宜
急遣官分頭召募官舍餘丁義勇起集民夫更替沿
河漕運官軍令悉隸神機等營

臣等謹按是時遣使募民壯詳郡國兵

十月造賞功牌

有奇功頭功齊力之分以文臣主之賊平視此論賞
凡挺身突陣斬將奪旗者與奇功牌生擒幹拉或斬

首一級與頭功牌雖無功而被傷與齊力牌

兵志曰是後將士功賞視立功之地準例奏行北邊為上東北邊次之西番及苗蠻又次之內地反賊又次之世宗時苦倭甚故海上功比北邊尤為最

十二月分諸將為三大營

總督軍務尚書于謙言在京官軍雖已選定第為三等若不分將官統領立營訓練恐臨敵之際兵不識

將將不識兵強弱不分進退不一難以成功宜以石亨為一營范廣副之楊洪為一營孫鏜副之各統官軍四萬以柳溥為一營過興副之統官軍二萬另選驍勇頭撥二三千人為遊兵使閑其節制於平時庶得其死力以禦敵從之

景帝景泰二年二月分大營軍為三班

時遼事棘班軍悉留京間歲乃放還取衣裝總兵官石亨言京營諸軍操備日久今聲息稍寧宜令輪流

取衣裝尚書于謙言請分為三班常留兩班在京北
直隸保定河間天津各衛所俱放五十日河南山東
俱放九十日淮揚鳳陽等處放百日選都指揮指揮
請勅領回依限赴操紫荆倒馬白羊三關及保定諸
城戍卒屬山東河南者亦照此例逃者官鎬秩三等
卒盡室謫邊衛至四年三月兵部言舊分三班疎放
今十營操練久未疎放請分兩班赴操亦從之

欽定續文獻通考卷一百二十二